

ՍՈՎԵՏԱԿԱՆ ՀԱՅԱՍՏԱՆԻ 40-ԱՄՉՈՒՆԻ  
К 40-ЛЕТИЮ СОВЕТСКОЙ АРМЕНИИ

Հ. Ու. Մելիքեան

ՍՈՎԵՏԱԿԱՆ ԻՇԽԱՆՈՒԹՅԱՆ ԱՌԱՋԻՆ ՔԱՅԼԵՐԸ ՀԱՅ ԳԱՂԹԱԿԱՆՈՒԹՅԱՆ  
ՀԱՐՑԻ ԼՈՒԾՄԱՆ ՈՒՂՂՈՒԹՅԱՄԲ (1921—1922)

Հայ ժողովրդի արևմտյան հատվածը, երկար ժամանակ գտնվելով սուլթանական Թուրքիայի դաժան տիրապետության տակ, բազմիցս ենթարկվել է մասսայական ջարդերի ու տարագրությունների: Թուրքական շովինիստները, հետապնդելով համաթուրքական քաղաքական որոշակի ծրագիր, սխտեմատիկ կոտորածներով, բռնագաղթեցումներով ու կրոնափոխությամբ հետևողականորեն նվազեցնում էին հայության թիվը, մինչև որ 1895—1915 թթ. արյունալից քսանամյակի ընթացքում, համատարած ջարդերով ու տարագրություններով, հայազրկեցին Արևմտյան Հայաստանը:

Հանրահայտ է, որ առաջին համաշխարհային իմպերիալիստական պատերազմի տարիներին վերջնականապես արյան հորձանքներում խեղդվեց ու կիզիչ անապատների ավազուտներում իր մահը գտավ արևմտահայության մեծամասնությունը: Դա հայ ժողովրդի պատմության ամենաողբերգական էջերից մեկն է:

Նրանք՝ ուլքեր բախտ ունեցան կենդանի մնալու, բայց մահն ապրելու և մարդկային պատմության մեջ գրեթե իր նախընթացը չունեցող գողգոթայով անցնելու, գրկվելով հայրենի օջախներից, նետվեցին աշխարհի տարբեր անկյուններ:

Միայն 1920 թ. նոյեմբերին Հայաստանում հաղթանակած Սովետական իշխանությունը փրկության ելք բացեց օտարության մեջ դեգերող բազմաշարժար սփյուռքահայ այն աշխատավորների համար, որոնք դասակարգային հրատակ տրամաբանությամբ դիմադարձ կատարեցին դեպի իրենց իսկական հանգրվանը, անվերապահորեն կանգնեցին Սովետական Հայաստանի պաշտպանության դիրքերում և միաժամանակ անկեղծ ցանկություն հայտնեցին վերադառնալու ազատագրված հայրենիք:

Սակայն գաղութահայ աշխատավորների հայրենակարոտ բաղձանքներն իրականացնելու և նրանց ներգաղթը դեպի Հայաստան կազմակերպելու պատմության կամքով Սովետական իշխանությանը վիճակված դերը սահմանափակված էր տնտեսական ու քաղաքական լուրջ դժվարություններով:

Սույն հոդվածի նպատակն է լուսաբանել Հայաստանում Սովետական իշխանության հաղթանակից անմիջապես հետո, 1921—1922 թվականներին, Կոմունիստական պարտիայի և Սովետական կառավարության ձեռնարկած միջոցառումները՝ դաշնակիների կազմակերպած 1921 թ. փետրվարյան ավանտյուրայի լիկվիդացման օրերին Պարսկաստան փախած ավելի քան մեկ տաս-

նյակ հազար բնակչությանը ետ վերադարձնելու, երկրում կուտակված արևմտահայ գաղթականությանը տեղավորելու և Միջագետքում տառապող հայ տարագիրների ներգաղթն իրականացնելու ուղղությամբ, որից հետո միայն հնարավոր եղավ իրականություն դարձնել նաև աշխարհով մեկ ցրված գաղութահայ տասնյակ հազարավոր աշխատավորների հայրենադարձությունը<sup>1</sup>:

\* \* \*

Սովետական իշխանությունը Հայաստանում հաղթանակեց մի այնպիսի ժամանակ, երբ երկիրը գտնվում էր կործանման անդունդի եզրին: Առաջին համաշխարհային իմպերիալիստական պատերազմը և դաշնակների ավանտյուրիստական քաղաքականությունը լիակատար քայքայման էին հասցրել Հայաստանը: Սովետական իշխանությունն անցյալից որպես ժառանգություն ստացավ սովի մատնված բնակչությամբ ավերակ գյուղեր ու քայքայված քաղաքներ: Հայաստանում գրեթե չկար մի անկյուն, որ ենթարկված չլիներ մասսայական ավերածությունների և բնակչությունն ապրած չլիներ գաղթի սարսափները: Նախկին Երևանի նահանգի փոքրիկ տերիտորիան ուղղված էր Արևմտյան Հայաստանից՝ Բայազետից, Վանից, Ալաշկերտից, Բիթլիսից, Մուշից, Սվաղից, մինչև անգամ Կիլիկիայից ու Պարսկաստանից եկած գաղթականներով: Թուրքիայի կողմից 1920 թ. գրավված Կարսի, Կադզվանի ու Սուրմալուի շրջանների բնակչությունը գրեթե ամբողջությամբ գտնվում էր Սովետական Հայաստանում: Երկրում կուտակված արևմտահայ գաղթականության թիվը անցնում էր 200 հազարից. սրանց ավելանում էր նաև տասնյակ հազարավոր որր ու անապատան երեխաների զանգվածը:

Կոմունիստական պարտիայի և Սովետական պետության ափանավոր գործիչ Գ. Կ. Որջոնիկիձեն 1920 թ. դեկտեմբերի 1-ին Բաքվի Սովետի հանդիսավոր նիստում ելույթ ունենալով Հայաստանում սովետական կարգերի հաստատման առթիվ և նշելով Սովետական իշխանության կառուցման դժվարություններն ընդհանրապես, ասում է. «...է՛լ ավելի դժվար է, միլիոն անգամ ավելի դժվար է այդ իշխանությունը կառուցել այնտեղ՝ տանջված, ծվատված Հայաստանում, որը քիչ է մնացել վերածվի զաղրակաճների ուսպուրիկայի»<sup>2</sup> (ընդգծումը մերն է— Հ. Մ.):

Երկրում կուտակված այդ գաղթականության առկայությունը Հայաստանի վիճակը սովետական մյուս ռեսպուբլիկաների շարքում դարձնում էր բացառիկ: Գաղթականական հարցը Սովետական Հայաստանի համար ամենադժվար լուծելի հարցերից մեկն էր, որովհետև դեռևս չտեղավորած երկրում գտնվողներին, արդեն սկսվել էր նոր ներգաղթողների հոսանքը տարբեր վայրերից, մի հանգամանք, որն ավելի էր բարդացնում դրությունը: Չնայած իր տնտեսական ու քաղաքական դժվարին կացությանը, ինչպես միշտ, այս անգամ ևս, հայ ժո-

<sup>1</sup> Այդ հարցերին մասնակիորեն անդրադարձել են Հ. Մ. Էլչիրեկյանը՝ «Վասպուրականի հայերը Միջագետքում և նրանց վերադարձը Սովետական Հայաստան» (ՀՍՍՌ ԳԱ «Տեղեկագիր», 1940, № 2, էջ 17—20) հոդվածում, և Հ. Մ. Հակոբյանը՝ «Սովետական Հայաստանը ժողովրդական տնտեսության վերականգնման ժամանակաշրջանում» (Երևան, 1955, էջ 315—317) մենագրության մեջ և Ս. Վ. Խարմանդարյանը՝ «Արմյանսկայա ССР в первый год новой экономической политики», (Ереван, 1955, стр. 144—151) ուսումնասիրության մեջ:

<sup>2</sup> Գ. Կ. Որջոնիկիձեն, Լենտի հոդվածներ և ճառեր, Երևան, 1950, էջ 34:

դավրդին եղբայրական օգնության ձեռք մեկնեց ռուս ժողովուրդը: Ոչ լրիվ տվյալներով, հենց միայն Հյուսիսային Կովկասում կուտակվել էին ավելի քան 130 հազար հայ գաղթականներ, որոնց նյութական հսկայական աջակցություն էր ցույց տալիս Սովետական Ռուսաստանը՝ Կենտրոնական Կովկասյան հատուկ լիազորության միջոցով, որը գործում էր 1920 թ. սեպտեմբերից: Կրաստանում և Ադրբեջանում գտնվող հայ գաղթականներին, հնարավորության սահմաններում, ապաստան էին տվել Սովետական իշխանության տեղական օրգանները<sup>3</sup>: Առանց եղբայրական այս հոգատարության, Սովետական Հայաստանը ի վիճակի չէր լինի աստիճանաբար լուծելու երկրում գտնվող գաղթականական բազմահազարանոց մասսային բնակեցնելու, հողով բավարարելու և այլ հարցերը:

Սակայն իր դոյուլյան առաջին ամիսներին նորաստեղծ Սովետական իշխանությունը գեռևս թույլ աշխատանք էր տանում արևմտահայ գաղթականության շրջանում, որովհետև չկային հարկ եղած նյութական միջոցներ, պակասում էին համապատասխան կադրերը և չկար աշխատանքի կազմակերպման անհրաժեշտ փորձ: Այդ հանգամանքն այնքան զգալի էր, որ Ալագյազի շրջանի գյուղերում վերաբնակվող մշեցիներն ու սասունցիները 1921 թ. սկզբներին մի խնդրագրով դիմում են ՀՍԽՀ Հեղկոմին այն կապակցությամբ, որ այդ գյուղերում վատ է կազմակերպված աշխատանքը և սլահանջ են առաջադրում, որ պետքի իրենց մոտ նույնպես կազմակերպվեն հեղկոմներ, ուղարկվեն պրոպագանդիստներ, գրականություն և այլն<sup>4</sup>: Հենց դաշնակցության կազմակերպած փետրվարյան ավանտյուրայի առաջացման գործում ոչ երկրորդական դեր խաղաց արևմտահայ այն գաղթականությունը, որը գեռևս չէր հիմնավորվել երկրում և մասամբ դուրս էր մնացել Սովետական իշխանության ուշադրության ոլորտից: Այդ հանգամանքը ճարպկորեն օգտագործվեց դաշնակցության կողմից: Դաշնակների կազմակերպած փետրվարյան ավանտյուրան, որը քաղաքացիական կռիվի մեջ քաշեց առանց այն էլ քայքայված երկիրը, զգալի վնաս հասցրեց նաև արևմտահայ գաղթականության հարցի շուտափույթ լուծմանը: Սովետական կառավարությունն ստիպված էր ժամանակավորապես ձեռնամուխ լինել այսպես կոչված «Հայրենիքի փրկության կոմիտեի» տխրահռչակ դիկտատուրայի լիկվիդացման օրերին դաշնակների տարածած սուտ լուրերի, ստոր պրոպագանդիստների ու սպառնալիքների հետևանքով Երևանից և այլ վայրերից Պարսկաստան անցած փախստականության վերադարձի կազմակերպմանը:

Դաշնակների ագիտացիային ու սպառնալիքներին զոհ գնացած փախստականների մոլորված մասսան սկզբում մտադիր էր մնալ Զանգեզուրում, բայց այնտեղ բնկնելով անողորմ սովի ու թշվառությունների հորձանուտը՝ խուճապահար շարժվում է դեպի Պարսկաստան: Յոթ-ութ հազար հոգի Ղարադաղի վրայով մեկնում են Թավրիզ, մի մասն էլ՝ կիսամերկ ու անոթի, մնում է Պարսկաստանի սահմանի մոտ, Արաքսի ափին, ցերեկվա արևի ու գիշերվա ցրտի տակ: Զանազան ավազակախմբեր կողոպտում էին նրանց մինչև վերջին շապիկը, շատերը խեղդվել էին գետն անցնելիս կամ սովամահ եղել: Թավրիզ

<sup>3</sup> Հայկական ՍՍՌ Հոկտեմբերյան սեյսմոլոգիայի և սողիալիստական շինարարության Կենտրոնական պետական արխիվ (հետազոտում կրճատ նշվում է՝ ՀՍՍՌ ՀԽԿՊԱ), ֆ. 40/113, ց. 3, գ. 21, թ. 49:

<sup>4</sup> Տե՛ս Ա. Լ. Հակոբյան, Սովետական Հայաստանը ժողովրդական տնտեսության վերականգնման ժամանակաշրջանում (1921—1923), Երևան, 1985, էջ 20:

<sup>5</sup> ՀՍՍՌ ՀԽԿՊԱ, ֆ. 4.114, գ. 5, թ. 31:

մեկնածուները կարճ ժամանակում վերջնականապես համոզվելով իրենց խաբվածության մեջ, արդեն մայիսի սկզբներին սկսում են ետ վերադառնալ Զուլֆա և այնտեղից խնդրում Սովետական Հայաստանի կառավարությունից՝ հնարավորություն տալ իրենց վերադառնալու հայրենի օջախները և զբաղվելու խաղաղ շինարարական աշխատանքներով<sup>6</sup>։ 1921 թ. ապրիլի 8-ին, նրանում Սովետական իշխանությունը վերահաստատվելուց վեց օր հետո, Հայհեղկոմը քննարկեց փախստականության հարցը և որոշեց հանձնարարել Հեղկոմի նախագահությանը մշակել ներման մասին ղեկրետի նախագիծ<sup>7</sup>։ Հեղկոմի ապրիլի 10-ի նիստում հաստատվեց նախագիծը և որոշվեց ներման ղեկրետը հրապարակել մամուլում<sup>8</sup>։ Այդ ղեկրետով շինարար աշխատանքի էին հրավիրվում բոլոր նրանք, ովքեր կուրորեն նետվել էին Սովետական իշխանության դեմ մրդվող պայքարի մեջ։ Դեկրետում նշվում էր, որ ՀՍԽՀ Ռազմա-հեղափոխական կոմիտեն որպես երկրի աշխատավոր մասսաների կառավարություն, չի կարող լինել ռիսկալ, չի կարող ղեկավարվել վրեժի զգացումով։ Նա անողոր է գործող հակահեղափոխության նկատմամբ, նա անխնա է այն չարագործ խմբակի վերաբերմամբ, որը յուր հանցավոր և պրովոկացիոն ագիտացիայով, մահվան վախի ու սպառնալիքի տակ հանդգնեց ստիպել անդիտակից ու անմեղ մասսային զենք բարձրացնելու բանվորա-գյուղացիական Սովետական իշխանության դեմ։ Հեղկոմը հանդիսավորապես մոռացության է տալիս հանցանքը բոլոր նրանց, որոնք Հայաստանի աշխատավորության հավիտենական թշնամիների ոճրագործ փրկումների զոհ են դարձել և գաղթականներին, աշխատավոր ինտելիգենցիային, որոնք այս կամ այն ձևով մասնակցել և մասնակցում են հակահեղափոխական շարժման, հրավիրում է շինարար աշխատանքի<sup>9</sup>։

1921 թ. ապրիլի 24-ին հրապարակվում է Հեղկոմի նոր ղեկրետը՝ ընդհանուր ներման մասին, որի համաձայն մեծահոգաբար ներումն էր շնորհվում ավանտյուրային մասնակցած բոլոր խավերին<sup>10</sup>։

Սովետական իշխանության հրապարակած այդ ղեկրետները յայն արձադանք գտան ինչպես երկրում կուտակված գաղթականության, այնպես էլ արտասահմանում ապաստան գտած մոլորված ու խաբված փախստականության շրջանում։ Ահա դրա բաղադրիչ վկայություններից մեկը. 1921 թ. ապրիլի 26-ին «Կոմունիստ» թերթը «Ներման ղեկրետի արձագանքը» խորագրի տակ, «Անկատեգոր քաղաքացի Արտակ Պալուցի» ստորագրությամբ, հրապարակում է հետևյալ նամակը. «Քայլ առ քայլ երկչոտությամբ մոտիկ է գալիս այն թյուրիմաց շերտը, բուն գաղթականը՝ նա կարդաց, լսեց և զգաստացած ներման ղեկրետներով, կամացուկ ձայնով ողջունում է կենտրոնական կուսակցության Կարմիր Ղեկին, Եվ ահա փարումն ու փարատումն միշտ իրենների, դու ես լիուլի»։ Թերթի խմբագրությունն իր կողմից գրում է. «Մեծ քավականությամբ տեղ ենք տալիս տաճկահայ «անկատեգոր քաղաքացու» այս անպաճույճ, բայց սրտարովս տողերին՝ առանց որևէ փոփոխության։ Նման «անկատեգոր քաղաքացիներին» թիվը շատ է, ևվ կենտրոնական կուսակցության Կարմիր Ղեկը» նորից կոչ է անում բոլոր ավելի անկատեգորներին՝ առանց երկչոտության,

<sup>6</sup> «Նորհրդային Հայաստան», օրաթերթ, Երևան, 28 մայիսի, 1921, № 94։

<sup>7</sup> ՀՍՍՌ ՀՌԿՊԱ, ֆ. 40/113, ց. 3, 43, թ. 2։

<sup>8</sup> «Կոմունիստ», օրաթերթ, Երևան, 12 ապրիլի, 1921, № 63։

<sup>9</sup> Տե՛ս «Կոմունիստ», 24 ապրիլի, 1921, № 72։

բաց ճակատով և անսպառ եռանդով լծվել մայրենի երկրի վերաշինման աշխատանքին: Եվ այսուհետև մեր ավեր հայրենիքում թող լինի բանվորա-գյուղացիական գործի աշխատողների կատեգորիա»:

Ներման դեկրետների ազդեցության տակ, անհապաղ երկիր վերադառնալու որոշումներ են կայացնում Թավրիզում կուտակված փախստականները, արևմտահայ գաղթականներն ու զինվորները<sup>10</sup>:

1921 թ. մայիսի 27-ին Ժողկոմխորհի նախագահությունը քննարկում է ներքին Գործերի Ժողովրդական Կոմիսար Պողոս Մակինցյանի ղեկուցումը՝ «գաղթականների խնդրի մասին» և կոնկրետ միջոցառումներ մշակում ամեն կերպ նրանց օգնելու համար<sup>11</sup>: Մայիսի 31-ին Ժողկոմխորհի նախագահության նիստում լսվում է «Թավրիզի գաղթականների խնդիրը» և որոշվում է նրանց փոխադրությունն արագացնելու և կազմակերպված իրականացնելու նպատակով Զուլֆա և Պարսկաստան գործուղել կառավարական հատուկ հանձնաժողով՝ Գրիգոր Վարդանյանի ղեկավարությամբ: Միաժամանակ հեռագրվում է երկաթուղային վարչությանը՝ փախստականներին Զուլֆայից Հայաստան տեղափոխելու համար վագոններ տրամադրելու մասին<sup>12</sup>:

1921 թ. հունիսի 1-ին Գր. Վարդանյանը իր չորս գործակիցների հետ միասին մեկնում է Զուլֆա՝ ղեկավարելու փախստականության վերադարձը, որն արդեն սկսվել էր մայիսի 26-ից, երբ պարսկա-սովետական սահմանն էր հասել Թավրիզից եկողների 300 հոգուց բաղկացած առաջին խումբը<sup>13</sup>: Մինչև 1921 թ. հունիսի կեսերը կարողացան իրենց հարազատ օջախները վերադառնալ ավելի քան 3250 մարդ<sup>14</sup>:

Փախստականների վերադարձը ժամանակավորապես խանգարվեց Զանգեզուրում ծվարած դաշնակցության մնացորդների ձեռնարկած վերջին ավանտյուրայի հետևանքով: 1921 թ. հունիսի 16-ին ՀՍԽՀ Ժողկոմխորհի նախագահ ու ռազմաժողով Ալ. Մյասնիկյանի և Նրևանի ռազմական խմբավորման հրամանատար Մ. Վելիկանովի ստորագրությամբ հեռագիր է ուղարկվում Զուլֆա՝ Ժողկոմխորհի գաղթականական գործերի հատուկ լիազոր Գր. Վարդանյանին, մինչև նժգհչյան բանդայի լիկվիդացումը գաղթականության ընդունումը դադարեցնելու մասին<sup>15</sup>:

Զանգեզուրի ազատագրումից հետո, օգոստոսի կեսերին, նորից վերսկսվում է փախստականների վերադարձը և կարճ ժամանակամիջոցում Հայաստան են ճանապարհվում ավելի քան 2500 մարդ<sup>16</sup>:

Երկրից վտարված ու Պարսկաստանում բուն դրած դաշնակները ամեն կերպ փորձում էին խանգարել փախստականության Հայաստան վերադառնալուն և դիմում են անգամ պրովոկացիաների ու սպառնալիքների: 1921 թ. օգոստոսի 21-ին Պարսկաստանից մի գաղթական մերկացնելով դաշնակների հակասովետական գործունեությունը, գրում էր ՀՍԽՀ Ժողկոմխորհին, որ նրանք ամեն կերպ խոչընդոտում են գաղթականության երկիր վերադառնալուն և

<sup>10</sup> «Նորհրդային Հայաստան», 23 օգոստոսի, 1921. № 154:

<sup>11</sup> ՀՄԽԽ ՀԻԿՊԱ, ֆ. 114, գ. 96, թ. 26:

<sup>12</sup> Ն ու յ ն տ ե ղ ու մ:

<sup>13</sup> Ն ու յ ն տ ե ղ ու մ, թ. 26 և 173—181:

<sup>14</sup> Ն ու յ ն տ ե ղ ու մ, 173—181:

<sup>15</sup> Ն ու յ ն տ ե ղ ու մ, թ. 84:

<sup>16</sup> Ն ու յ ն տ ե ղ ու մ, թ. 193—181:

ասում են, թե «Հայաստանում սով է, բանտերը լցված են, բոլշևիկները սպանում են վերադարձողներին» և այլն, «ավելի լավ է այստեղ մեռնել, քան թե գնալ Հայաստան»։ Նույն նամակի հեղինակը նշում էր, որ չնայած այդ բոլոր զրպարտություններին, ամբողջ գաղթականությունը ցանկանում է գալ հայրենիք<sup>17</sup>։

Սովետական կառավարության ձեռք առած միջոցառումների շնորհիվ, Կոմունիստական պարտիայի և Սովետական պետության ակադեմիկոս գործիչ, ՀՍԽՀ ժողկոմխորհի առաջին նախագահ Ալ. Մյասնիկյանի և Արտաքին Գործերի ժողկոմ Ասք. Մռավյանի ամենօրյա ուղադրության շնորհիվ, փախստականության վերադարձը իրականացվում էր կազմակերպված ձևով։

Դեռևս 1921 թ. հուլիսի կեսերին ՀՍԽՀ ժողկոմխորհի ղեկը տվել էր ներքին Գործերի ժողկոմատի կենտրոնական բաժինը և ստեղծվել էր ժողկոմխորհին առընթեր Գաղթականական Գործերի Գլխավոր վարչություն (Գաղթվար), որը ուներ ժողովրդական կոմիսարիատներին հավասար իրավունքներ<sup>18</sup>։ Գաղթականական Գործերի Գլխավոր վարչության նախագահ է նշանակվում Սոցապոլիտ նարիման Տեր-Ղազարյանը, նախագահի տեղակալ՝ Հովհ. Դուրգերյանը (Ռ. Դուրգարյան), անդամներ՝ Ա. Շահգեղյանը, Թունունցը և Քալանթարը<sup>19</sup>։ Գաղթականական Գործերի վարչությունը մեծ դեր խաղաց ներգաղթի կազմակերպման և գաղթականության տնտեսական դրությունը բարելավելու ուղղությամբ և 1921 թ. վերջերին, երբ արդեն Սովետական կառավարության ձեռք առած կտրուկ միջոցառումների շնորհիվ որոշ չափով նորմալ հունի մեջ էր դրվել գաղթականական հարցի լուծումը, այն որպես իր խնդիրները կատարած մի օրգան, լիկվիդացվեց։ Նրա ֆունկցիաների մի մասը հանձնվեց ներքոթոմոլկոմատում կազմակերպված գաղթականական բաժնին, մի մասն էլ՝ Սոցապոլիտատին<sup>20</sup>։

Սովետական կառավարության գործադրած ջանքերի շնորհիվ, մինչև 1922 թ. գարունը հաջողվեց հայրենի օջախները վերադարձնել Երևանից, Զանգեզուրից և Նախիջևանից Պարսկաստան անցած համարյա թե բոլոր փախստականներին, որոնք խաբվել էին դաշնակների պրոպոկանդիաների հետևանքով, կամ ենթարկվել նրանց սպառնալիքներին։

Փախստականությունը հայրենիք վերադարձնելու գործում մեծ օգնություն էր ցույց տալիս Սովետական Ռուսաստանը։ Պարսկաստանում ՌՍՖՍՌ լիազոր ներկայացուցչության և հյուպատոսությունների, իսկ 1921 թ. նոյեմբերից ՀՍԽՀ լիազոր ներկայացուցչության կողմից, գաղթականներին տրվում էր դրամական նպաստ ու պարեն ճանապարհի համար և պարսկա-սովետական սահմանն անցնելու անցաթղթեր։ Վերադարձողներին անհրաժեշտ բժշկական օգնություն կազմակերպելու նպատակով Երևանից Զուլֆա էին ուղարկվել բժիշկներ և դեղորայք<sup>21</sup>։

Միաժամանակ Հայաստան էին վերադառնում դաշնակների ազգամիջյան կռիվների պատճառով երկրից հեռացած տասնյակ հազարավոր ազդեցանյի,

<sup>17</sup> Նույն տեղում, ֆ. 4/114, գ. 99, թ. 12—14։

<sup>18</sup> Նույն տեղում, ֆ. 40/113, ց. 3, դ. 50, թ. 28 և 34։

<sup>19</sup> Նույն տեղում, ֆ. 4/114, դ. 17, թ. 84։

<sup>20</sup> Նույն տեղում, ֆ. 40/113, ց. 3, դ. 28, թ. 37։

<sup>21</sup> Նույն տեղում, ֆ. 114, դ. 96, թ. 48։

ուսու և այլազգի աշխատավորները, որոնց նույնպես նյութական ու բարոյական լայն աջակցություն էր ցույց տալիս Սովետական կառավարությունը<sup>22</sup>:

Դեռևս 1920 թ. դեկտեմբերի 15-ին Հայհեղկոմը վերացնում է երկրից հեռացած մահմեդական բնակչության ունեցվածքը բռնագրավելու վերաբերյալ դաշնակցական կառավարության որոշումը և հրապարակում է հատուկ ղեկավարացիա ուղղված մահմեդական գաղթականության, որտեղ հայտարարվում էր, որ նրանք բոլորն էլ կարող են ազատորեն վերադառնալ նախկին տեղերը և տեղ կանգնել իրենց ունեցվածքին<sup>23</sup>: Այս և նման այլ միջոցառումների շնորհիվ, Հայաստանից հարկադրաբար հեռացած մահմեդական բնակչությունը վստահ կերպով վերադարձավ իր նախկին բնակավայրերը և լծվեց շինարար աշխատանքի:

\*

Դաշնակների փետրվարյան ավանտյուրայի ջախջախումից հետո, Սովետական կառավարությունը լուրջ աշխատանք ծավալեց նաև երկրում գտնվող արևմտահայության շրջանում:

Նախ և առաջ Հայաստանի և Վրաստանի արևմտահայերի մեջ կազմակերպական աշխատանք տանելու նպատակով, Ժողկոմխորհի նախագահության որոշմամբ հատկացվեց 30 միլիոն ռուբլի<sup>24</sup>:

Հրավիրվեցին արևմտահայ գաղթականների բազմամարդ ժողովներ, որոնք մեծ նշանակություն ունեցան նրանց վերաբերմունքի մեջ բեկում առաջացնելու իմաստով: 1921 թ. մայիսի 21—23-ը Թալինում տեղի է ունենում էջմիածնի գավառի արևմտահայերի համագումարը, որտեղ լսվում են Հայհեղկոմի անդամ Դրաստամատ Տեր-Սիմոնյանի, էջմիածնի Հեղկոմի նախագահ Արամ Շահգեղյանի, էջմիածնի գավառի գաղթականության կոմիսար Գրիգոր Վարդանյանի և ուրիշների զեկուցումները գաղթականությանը հուզող խնդիրների և Սովետական իշխանության ձեռնարկումների մասին: Համագումարը լիովին հավանություն է տալիս Սովետական կառավարության վարած քաղաքականությանը և կոչ է անում արևմտահայ բոլոր գաղթականներին կապվել հողի հետ և լծվել երկրում ծավալված վերաշինական աշխատանքներին, որովհետև «Միայն ՀՍԽ Հանրապետության հարատև գոյության ու ամրապնդման միջոցով Հայաստանի աշխատավորությունը կարող է իր իղձերն ու փափագները իրագործված տեսնել»<sup>25</sup>:

Նման բազմամարդ ժողովներ են ունենում նաև Ղամարուլի (այժմ Արտաշատ), Ղուրդուղուլի (այժմ Հոկտեմբերյան), Ալեքսանդրապոլի (այժմ Լենինական) և այլ շրջանների արևմտահայ աշխատավորները: Այդ ժողովներում որոշվում է հրավիրել Սովետական Հայաստանի տերիտորիայում ապրող արևմտահայ գաղթականների համագումար և մշակել ընդհանուր վերաբերմունք Սովետական իշխանության նկատմամբ<sup>26</sup>: Շուտով Թիֆլիսում սկսվում է հրատարակվել արևմտահայ աշխատավորների օրգան «Կարմիր օրեր» թերթը<sup>27</sup>:

<sup>22</sup> Ն ու յ ն տ ե ղ ու մ, գ. 5, թ. 20:

<sup>23</sup> Ն ու յ ն տ ե ղ ու մ, գ. 17, թ. 9:

<sup>24</sup> Ն ու յ ն տ ե ղ ու մ, ֆ. 40/113, ց. 3, գ. 25, թ. 38:

<sup>25</sup> Ն ու յ ն տ ե ղ ու մ, ֆ. 4/114, գ. 5, թ. 2, տե՛ս նաև ֆ. 40/113, ց. 3, գ. 22, թ. 104—113:

<sup>26</sup> Ն ու յ ն տ ե ղ ու մ, ֆ. 4/114, գ. 5, թ. 25—26:

<sup>27</sup> Ն ու յ ն տ ե ղ ու մ, թ. 43:

Սովետական իշխանության պաշտպանությամբ հանդես են գալիս նաև Թիֆլիսում կուտակված արևմտահայ գաղթականները: Նրանց առաջին ժողովը, որը տեղի ունեցավ 1921 թ. մարտի 27-ին, վերագնահատելով անցյալի դիրքորոշումը, մի կոչով դիմեց արևմտահայ բոլոր աշխատավորներին: Այնտեղ ասված էր. «...Բավ է, որքան արևմտահայ աշխատավորական մասսաներս տասնյակ տարիներ գործիք ու խաղալիք եղանք զաշնակցություն կոչված ավանտյուրիստական կուսակցության միջոցով՝ եվրոպական գիշատիչ իմպերիալիստների ձեռքին. հերիք է, ինչքան արյուն ու ավյուն զոհաբերեցինք այդ լպիրշ, ստորաքարշ, խաբեբա դիպլոմատների գրպանները էլ ավելի պարարտացնելու համար: ...Այո, մենք երեկ կույր էինք մտքով և մեր կուրությունը անխղճորեն շահագործեցին իմպերիալիզմի տխրահռչակ լակեյները՝ մեծ ու պստիկ Անտանտը և նրանց դոներին մշտապես քարշ եկող ազգադավ զաշնակցությունը:

...Մեզ համար այլևս պարզ է ամեն ինչ. մենք միանգամ ընդմիշտ մեր Թիկունքն ենք դարձնում Հայաստանի աշխատավորության միակ թշնամիներին՝ իմպերիալիստական աշխարհին, զաշնակցական և մնացած բոլոր ազգայնական շուկեն ու ոճրագործ կուսակցություններին»<sup>28</sup>:

Այնուհետև նշելով, որ ճնշված ու տառապած հայ աշխատավորության փրկությունը կախված է Սովետական իշխանության ամրապնդումից, կոչի հեղինակները արևմտահայ գաղթականությանը հրավիրում էին համախմբվելու Սովետական իշխանության շուրջը և լծվելու երկրի վերաշինության վեհ գործին:

1921 թ. օգոստոսի 21-ին կայացավ Թիֆլիսաբնակ արևմտահայ աշխատավորության անպարտիական կոնֆերանսը, որը քննարկեց արևմտահայ աշխատավորության օրինենտացիայի, Սովետական Հայաստանի վերաշինության, արտասահմանյան հայ գաղութների և ընդհանրապես գաղթականության հարցերը: Կոնֆերանսն ընտրեց 15 հոգուց բաղկացած Թիֆլիսի Արևմտահայ բյուրո, որը կոչով դիմեց արտասահմանի հայ գաղութներին և նկարագրելով Սովետական Հայաստանի կառավարության ջանքերը արևմտահայության տեղավորման և ամեն կերպ նրանց օգնելու ուղղությամբ, կոչ արեց նպաստել երկրի վերաշինմանը, չհամատալ զրպարտություններին, այլ զալ երկիր, տեսնել և համոզվել<sup>29</sup>:

Իսկ տեսնելու և համոզվելու շատ բան կար. Սովետական իշխանությունը կարճ ժամանակամիջոցում գործով ցույց տվեց, որ նա իսկապես անկեղծորեն մտածում է գաղթականության վիճակի բարելավման մասին: 1921 թ. գարնանից սկսած ՀԱԽՀ Հողագործության ժողովրդական Կոմիսարիատը հող է տրամադրում Հայաստանի սահմաններում գտնվող արևմտահայ գաղթականներին, տեղացիներին հավասար չափով<sup>30</sup>:

Գաղթականության կարիքները հոգալու և նրանց համար պարենի ու սերմացուի հատուկ ֆոնդ հիմնելու նպատակով, 1921 թ. օգոստոսի 21-ին ժողկոմխորհը որոշում է կայացնում Պարենավորման ժողկոմատի ընթացիկ աղբյուրներից պարբերաբար հատկացնել հացահատիկ: Այդ որոշման համաձայն բոլոր նախկին հողատերերը, որոնք անմիջականորեն իրենք չէին մշակում

<sup>28</sup> «Կոմունիստ», 23 ապրիլի, 1921, № 71:

<sup>29</sup> ՀԱԽՀ ՀԻԿԳԱ, ֆ. 4/114, ց. 5, թ. 37—38:

<sup>30</sup> Ն ու յ ն տ ե ղ ու մ, թ. 20:

իրենց հողերը, այլ զանազան պայմաններով՝ վարձակալությամբ և այլն, ուս-  
լիս էին սակավահող գյուղացիներին, զրկվում էին բերքից և այն հատկացվում  
էր գաղթականական ֆոնդին<sup>31</sup>։

Ժողովոմխորհի մի այլ դեկրետով (22 հոկտեմբերի 1921 թ.) հաստատվում  
է 15 միլիարդ ռուբլի միանվագ և արտակարգ տուրք՝ Հայաստանի սահման-  
ներում գտնվող հարյուր հազարավոր գաղթականներին նյութական ծանր կա-  
ցությունից դուրս բերելու համար։ Գաղթականական տուրքը գանձվում էր ազ-  
գաբնակչության միայն ունևոր խավերից. այն անձնավորությունները, որոնց  
գոյությունը պաշտպանելու կամ եկամտի միակ միջոցը աշխատավարձն էր  
ազատվում էին տուրքը վճարելուց<sup>32</sup>։ Բացի այս ձեռնարկումները, գաղթական-  
ներին արտոնյալ պայմաններով տրամադրվում էին շինարարական և գույքա-  
վորման երկարատև վարկեր, բնակարաններ, գյուղատնտեսական գործիքներ,  
անասուններ և այլն։

1922 թ. գարնանից Հողժողովոմատը ձեռնարկում է ռեսպուբլիկայում հողա-  
շինարարական ծավալուն աշխատանքներ, միաժամանակ կատարում երկրում  
կուտակված գաղթականության հաշվառում։ Այդ միջոցառումների շնորհիվ  
մասամբ հաջողվում է պարզել հողագուրկ գաղթականների քանակն ու կարյե-  
րներ և հնարավորության սահմաններում նրանց բավարարություն տալ։ Ներք-  
գործողովոմատի գաղթականական բաժնի կողմից հաշվառման ենթարկված  
128.634 գյուղական գաղթական բնակչությունից առ 1-ը փետրվարի 1923 թ.<sup>33</sup>  
հողով բավարարված էին 49.000 մարդ, իսկ 79.634 մարդ ղեռն մնում էին  
հողագուրկ վիճակում<sup>34</sup>։ Այստեղ չեն ընդգրկված ևրևան ու Հենիկական քա-  
ղաքների և Զանգեզուրի, Դարալագյազի ու Մեղրու գավառների գաղթական-  
ները։ Համաձայն Հողժողովոմատի տվյալների, այդ նույն ժամանակ հողով բա-  
վարարված էին 64.000 գաղթականներ<sup>35</sup>։ Այս տվյալները միայն մոտավոր գա-  
ղափար կարող են տալ ինչպես գաղթականության ընդհանուր թվի, այնպես էլ  
նրանց հողով ապահովվածության մասին, քանի որ զանազան պատճառների  
հետևանքով նրա հաշվառման գործը երբեք էլ չհաջողվեց հասցնել բարձր վի-  
ճակի։ Դացի, այդ, այստեղ ցույց չեն տրված հողով բավարարություն ստացած  
այլազգի գաղթականները, որոնք նույնպես երկրում մեծ թիվ էին կազմում։  
Հայաստանի նման սակավահող մի երկրում խիստ դժվար էր գաղթականների  
հարյուր հազարավոր մասսային բավարարել հողով, գյուղատնտեսական գոր-  
ծիքներով, սերմացուով, անասուններով և այլն։ Գաղթականներին սակավա-  
հող գավառներից դեպի համեմատաբար հողառատ շրջանները տեղափոխե-  
լու համար անհրաժեշտ էին նյութական ու փոխադրական լայն հնարավորու-  
թյուններ, մի բան, որից զրեթև դուրկ էր նորաստեղծ Սովետական իշխանու-  
թյունը։ Այնուամենայնիվ, ճիգերի մեծ լարումով, Սովետական կառավարու-  
թյունը կատարում էր այդ աշխատանքները։ Այսպես, 1922 թ. Նարաբիլիսայի  
շրջանից Բասարգեշար են տեղափոխվում 2757 շունչ գաղթականներ, նոր վայ-  
րերում ստանում հողամաս, բնակարաններ և երկարատև վարկ՝ լծկաններ ու

<sup>31</sup> Ն ու յ ն տ ե ղ ու մ, ֆ. 4/114, դ. 3, թ. 39։

<sup>32</sup> Ն ու յ ն տ ե ղ ու մ, թ. 60։

<sup>33</sup> Ն ու յ ն տ ե ղ ու մ, ֆ. 40/113, ց. 3, դ. 421, թ. 35—36։

<sup>34</sup> Ն ու յ ն տ ե ղ ու մ, ֆ. 123, ց. 1, դ. 1576, թ. 13—15։

<sup>35</sup> Տե՛ս «Ռոբհրդային Հայաստան—1920—1923», ժողովածու, Երևան, 1926, էջ 109։

գյուղատնտեսական գործիքներ ձեռք բերելու համար<sup>36</sup>։ Ներքին այս փոխադրությունները ավելի մեծ մասշտաբներով շարունակվեցին հաջորդ տարիներին։

\* \* \*

Երկրում կուտակված գաղթականությունը լինակեցնելուն, հողով և այլ միջոցներով բավարարելուն զուգընթաց, Սովետական կառավարությունը իր գոյություն առաջին իսկ օրերից հսկայական աշխատանք է կատարել նաև արտասահմանում դեգերող հայ աշխատավորներին հայրենիք վերադարձնելու ուղղությամբ։ Գաղութահայ աշխատավորական մասսաները գոտեպնդիչ լուրեր ստանալով երկրում տեղի ունեցող արմատական վերափոխումների մասին, իրենց հայացքները աներկբայելիորեն հասում էին դեպի Սովետական Հաստատան։

Հայաստանի կոմունիստական պարտիայի Կենտկոմը և Սովետական կառավարությունը բազմաթիվ դիմումներ էին ստանում սփյուռքահայ աշխատավորներից՝ իրենց Հայաստան գալու հնարավորությունն ընձեռելու խնդրանքով։ Սովետական կառավարությունը չէր կարող անտարբեր մնալ դրանց նրկատմամբ։ Շատ դիմումներ էին ստացվում հատկապես Միջագետքի հայ գաղթականներից, որոնք գտնվում էին դժնդակ պայմաններում։ Դրանք հիմնականում Վասպուրականի հայերն էին (մոտ 17 հազար մարդ), որոնք թուրքերի ուխտադրուժ հարձակման հետևանքով, 1918 թ. վաղ զարնանը մասսայաբար փախչում են դեպի Անդրկովկաս, սակայն Վան-Բղդիր ճանապարհը թուրքական բանակի կողմից փակվելուց հետո, ստիպված են լինում անասելի զրկանքներով ու բազմաթիվ զոհեր տալով, երկարատև ճանապարհ կտրել դեպի Պարսկաստան, հույս ունենալով այնտեղից անցնել Անդրկովկաս։ Սակայն նրանց Պարսկաստանից Անդրկովկաս փոխադրվելու մտադրությունը ևս չի հաջողվում իրականացնել, քանի որ թուրքական զորքերը մտել էին Պարսկաստան և կտրել ճանապարհը դեպի Անդրկովկաս։ Վասպուրականցիները և նրանց միացած խոյի, Սալմաստի, Ուրմիայի հայերն ու նեստորական ասորիները ստիպված շարժվում են դեպի Հարավային Պարսկաստան։

1918 թ. հունիսի վերջերին Պարսկաստանում գտնվող անլիակական զորքերի հրամանատարությունը գաղթականների այդ մասսային իր նպատակներին ծառայեցնելու համար, վերցնում է իր «հովանավորության» տակ։ Օգոստոսի սկզբներին նահանջող գաղթականությունը հասնում է Համադան, բայց անգլիացիները նրանց արգելում են մտնել քաղաք<sup>37</sup>։ Անլիացիները համոզում են գաղթականությունը, որ ամենահարմար ելքն այն է, որ տեղավորվեն Միջագետքում, մի առժամանակ մնան այնտեղ, խոստանալով իրենց սեփական նավերով շուտով նժանց տեղափոխել Հայաստան<sup>38</sup>։ Միջագետքի սահմաններից ներս մտնելուց հետո անգլիացի անմիջապես զինաթափում են հայ-ասորական 6—7 հազարանոց զինված ջոկատը, բացի նրանցից, որոնք ցանկություն են հայտնում ընդգրկվել անգլիական զորքերի կազմի մեջ։ Անգլիական իշխանությունները գաղթականներին հավատացնում էին, թե իբրդ կատարվում է գաղթականների մեջ կարգապահություն պահպանելու և նրանց պատահական

<sup>36</sup> Ն ու Յ ն տ է դ ու մ, էջ 99։

<sup>37</sup> Հ Մ Ս Ս Ի Հ Ռ Կ Գ Ա, ֆ. 114, դ. 267, թ. 119—121։

<sup>38</sup> «Խորհրդային Հայաստան», 25 սեպտեմբերի, 1924, № 219։

րանդիտներից պաշտպանելու համար: Այդպես ստեղծվում են երկու-երեք հայ-ասորական գումարտակներ և ուղարկվում Զենջան՝ օգնելու թուրքերի դեմ կռվող անգլիական զորքերին<sup>39</sup>։ Գաղթականությունը կարճ ժամանակամիջոցում համոզվում է, որ անգլիական գաղութարարները ծրագրել են հայերից և ասորիներից ստեղծել զինված ուժեր ու նրանց օգտագործել արաբական աշխարհում իրենց բռնակալ թաթի սմուր պահելու և միաժամանակ Հարավային Պարսկաստանի ու Միջագետքի նավթահանքերը անձեռնմխելի դարձնելու գործում:

Հայ գաղթականությունը ծառացավ այդ ստոր խաբեության դեմ և պահանջեց իրագործել Հայաստան փոխադրելու մասին կատարած խոստումները: Անգլիացիք զգալով գաղթականության ըմբոստացումը, սկսեցին ձեռքարկելությունների ու պատիժների ենթարկել առավել աչքի ընկնող տարրերին, իսկ հիմնական մասսային զինված պահակախմբերի հսկողության տակ փոխադրել Բաղդատի մոտ, որտեղ նրանց տեղավորում են վրանների տակ, հատուկ ճամբարներում (քեմբերում):

Ռեալ վիճակագրության չգոյության հետևանքով, դժվար է որոշակիորեն ասել, թե որքան հայեր հասան Միջագետք: Ըստ վկայությունների, 1918 թ. աշնանը Համադանում, Քիրմանշահում և Բաքուբայում հաշվվում էին ավելի քան 16 հազար հայեր, որից միայն Բաքուբայում՝ 15 հազար (այլ աղբյուրների համաձայն 1919 թ. Բաքուբայում կային 10 հազար վասպուրականցիներ, 5—6 հազար ուրմիացիներ ու խոյեցիներ և առաջին համաշխարհային պատերազմի ժամանակ Միջագետք անցած 3 հազար արևմտահայեր, այսպիսով ընդամենը 18—19 հազար հայ)<sup>40</sup>:

Այսպիսով, վասպուրականի, Ուրմիայի, Սալմաստի և հոյի տարագիր հայության մեծ մասը գտնվում էր Բաղդատից ոչ հեռու՝ Բաքուբա ավանում: Ծամբարում ապրողներին անգլիացիները բաց էին թողնում աննշան քանակությամբ անորակ մթերքներ, որով մի կերպ իրենց գոյությունն էին քարշ տալիս գաղթականները: Քեմբերը շրջապատված էին փշալարերով և գտնվում էին հնդկ զինվորների խիստ հսկողության տակ: Հայերին արգելվում էր դուրս գալ ճամբարից և աշխատանք որոնել Բաղդատում կամ մի այլ վայրում: Գաղտնի Բաղդատ կամ Բասրա աշխատանք փնտրելու փախչողներին անգլիացիները հետապնդում էին, գտնում և ենթարկում մեկամսյա բանտարկության ու կատարել տալիս տաժանակիր աշխատանքներ, իսկ եթե չէր հաջողվում նրանց բռնել, այդ դեպքում փախածի ընտանիքին էին վտարում քեմբից դեպի անապատ: Սովն ու համաճարակները օրական տասնյակ զոհեր էին խլում անապատի կիզիչ արևի տակ տառապող վրանաբնակներից:

Գաղթականներին տրվող նպաստի դիմաց տղամարդկանց ձրի աշխատեցնում էին կառուցվող երկաթուղու շինարարության վրա, ուր նրանք ենթակա էին անգլիական սպաների սանձարձակ կամայականություններին: Անգլիական իշխանությունները, գաղթականության մի մասին 1920 թ. աշնանը փոխադրում են Բասրայի նահանգի նահրէլօմար գետափնյա ավանը՝ տեղի նավթահանքերում և ստրատեգիական նշանակություն ունեցող շինարարական օբ-

<sup>39</sup> ՀՍՍՌ ԿԳՊԱ, ֆ. 68/200, գ. 125, թ. 9 և 16:

<sup>40</sup> ՀՍՍՌ ՀԽԿՊԱ, ֆ. 114, գ. 267, թ. 119—121:

յեկտներում աշխատեցնելու նպատակով, ուր ավելի է վատթարանում առանց այն էլ թշվառության մեջ գտնվող հայ տարագիրների վիճակը: Անգլիական գաղութարարները արաբական աշխարհում իրենց գիրքերը ամրապնդելու և կայուն հենարան ստեղծելու համար ձգտում էին քրիստոնյա հայերին և սուրբերին կապել հողի հետ, հակադրություն ստեղծել վերջիններիս և արաբների միջև: Այդ առթիվ ու քեմալական թուրքիայի հրահրումների հետևանքով, տեղական արաբները մի քանի անգամ զինված հարձակումներ են գործում հայ գաղթականների ճամբարների վրա և վնասներ պատճառում նրանց: Այսպիսի դժվարին իրադրությունից ելք գտնելու համար, Միջագետքի հայությունը փորձում էր կապ ստեղծել Բաղդատի, Պոլսի և Երևանի բարեգործական ու ազգային հիմնարկությունների հետ: 1919 թ. ամռանը նրանց հաջողվում է կապվել էջմիածնի հետ և տեղեկացնել իրենց թշվառ կացության մասին: 1919 թ հուլիսի 9-ին Ամենայն Հայոց Կաթողիկոսի դիմանք հայտնով է դաշնակցական կառավարությանը, որ Բաղդատի Հայոց Առաջնորդական փոխանորդի ապրիլի 27-ի գրության համաձայն «Միջագետքում այժմ գտնվում են 25 հազար հայ փախստականներ, որոնք ապրում են շատ դառն պայմանների մեջ և եթե նոցա զեպի իրենց հայրենիք գաղթը շուտով չկատարվի, հայակեր Միջագետքը կույ պիտի տա այդ մնացյալ փոքր հայությանը ևս»<sup>41</sup>: Ներկայացնելով գաղթականության թշվառ վիճակը, Կաթողիկոսի դիմանքն առաջարկում էր դաշնակցական կառավարությանը արագացնել նրանց ներգաղթի կազմակերպումը: 1919 թ. հուլիսի 17-ին դաշնակցական կառավարությունը պատասխանում է էջմիածնին, որ «ներգաղթը առայժմ հնարավոր չէ, վասն որոյ կառավարությունը ուղարկում է Բաղդատ իր ներկայացուցիչը՝ նրանց դրությունը պարզելու»<sup>42</sup>: Տեղի տալով արևմտահայ պառլամենտականների պահանջներին, դաշնակցական կառավարությունը ձևականորեն որոշում է ներկայացուցիչ ուղարկել «...Միջագետք՝ հոն գտնվող տառապակոծ գաղթականությանը Հայաստան փոխադրելու նպատակով»<sup>43</sup>: Սակայն հենց այդ ներկայացուցչի հայտարարությամբ, դաշնակցական կառավարությունը միայն անվանապես 3 միլիոն ռուբլի քվեարկել տվեց ներգաղթին հատկացնելու համար: Իրականում ոչ մի կուպեկ էլ չտրամադրվեց այդ գործին, և դա կատարվեց «տաճկահայ պատգամավորներուս, հետևաբար մեր ետևը կանգնած 400000 գաղթականությանը քնացնելու համար...» և ոչ թե իսկապես նրանց օգնելու»:

Օգնության մասին գաղթականության օրհասական կանչերին անտարբերությամբ վերաբերվեցին նաև Կ. Պոլսի հայկական պատրիարքարանը և ազգային-բարեգործական այլ կազմակերպությունները, իսկ Բաղդատում ստեղծված գաղթականների կոմիտեն անամոթաբար յուրացնում էր փախստականների ու որբերի անունով Հնդկաստանում, Ճապոնում և այլուր հանգանակված գումարների մեծ մասը:

Այսպես, անխուսափելի կորստյան ճիւղաններում գալարվում էր Միջագետքի հայ գաղթականությունը, երբ Հայաստանում հաստատվեցին սովետական կարգերը: Այդ լուրը ցնծությամբ ընդունեցին միջագետքահայ աշխատավորները և վերակենդանացավ հայրենիք վերադառնալու նրանց հույսը: Շուտ-

<sup>41</sup> ՀՍՍՌ ԿԳՊԱ, ֆ. 68/200, գ. 281, թ. 107:

<sup>42</sup> Ն ու յ ն տ ե դ ու մ, թ. 108:

<sup>43</sup> «Երևան», Երկօրյա թերթ, Փարիզ, 28 ապրիլի, 1929, № 498:

<sup>44</sup> Ն ու յ ն տ ե դ ու մ:

տով նրանք կապվում են Պարսկաստանում ՌՍՖՍՌ լիազոր ներկայացուցչության, ապա նաև Սովետական Հայաստանի հետ։ Հայաստանի Կոմունիստական պարտիայի Կենտկոմը և Սովետական կառավարությունը, ծանոթանալով Միջազգետքի հայության ծանր կացության հետ, անմիջապես միջոցներ են ձեռնարկում նրանց վիճակը բարելավելու, ինչպես նաև հայրենիք վերադարձնելու ուղղությամբ։

1921 թ. հուլիսի 2-ին Հայաստանի Կոմունիստական պարտիայի Կենտկոմը մի կողմից դիմում է Համադանի, Քիրմանշահի, Սուսուլի և Նահրեջումարի հայ գաղթականական զանգվածներին, ուր նշվում էր, որ «ՀԿԿ-ը, ամենամեծ համակրանքով և նույնքան խորունկ վշտով, հետևում էր Ձեր գերմարդկային գողգոթային, անասելի տառապանքներին, որ կը տանիք ամբողջ երեք, երկա՛ր տարիներե՛ր վեր»։

Հայաստանի Կոմունիստական կուսակցությունը, մինչև այսօր ամբողջապես կտրված ըլլալով Ձեզմե՝ չոսավ և չէր կարող ըսել իր պատմական խոսքը՝ մինչև այն ատեն, երբ տակավին Հայաստանի և հայ աշխատավորության բախտը ձեռք բռնած ունեին ազգային բուրժուական կուսակցությունները։

...Ձեռք առնելով Հայաստանի իշխանությունը—հայ գյուղացիության և աշխատավոր ժողովրդի կամքով, այժմ մեր առաջին աշխատանքների հետ միասին ձեռնարկում ենք նաև Ձեր տառապանքներուն այլևս միանգամայն ընդմիջտ վերջ տալու անխուսափելի և անհրաժեշտ պահանջին»<sup>45</sup>։

Հայաստանի Կոմպարտիայի Կենտկոմը գնահատելով ոչ հեռավոր անցյալի դեպքերը, և հայ ժողովրդին հասած աղետները, կոչ էր անում համայն աշխարհով մեկ ցրված հայությանը՝ վերադառնալ հայրենիք՝ Սովետական Հայաստան և նվիրվել շինարար աշխատանքի։

«Կոչ անելով վերադառնալ դեպի հայրենի երկիրը, ի խնդիր անոր շինարարության, ի խնդիր Ձեր աստանդական կյանքին, Հայաստանի Կոմունիստական կուսակցությունը և հորհրդային իշխանությունը պիտի ի գործ դնեն իր բոլոր հնարավոր միջոցները, ապաստան տալու, վերաբնակեցնելու համար Ձեզի, գյուղերու թե քաղաքներու մեջ, պիտի տա իր բոլոր կարելի և անկարելի միջոցները, անելով իր լավագույն ճիգը՝ ընդառաջելու համար Ձեր կարիքներին, մինչև որ Դուք ևս իր հերթին կարողանաք նվիրվել մեր երկրի վերաշինության սրբազան գործին»։

Հայաստանի Կոմունիստական կուսակցությունը, ղրկելով իր ներկա կոչ-դիմումը, կը գիտակցե իր անելիք աշխատանքի մեծության վրա, բայց և ան կը գիտակցի նաև իր պարտքի, պարտականության վրա, որ անհրաժեշտորեն կը ներկայանա իրեն և կը դառնա հերթական հարց»<sup>46</sup>։

Սովետական կառավարությանը լուրջ մտահոգություն էր պատճառում Միջազգետքի հայ գաղթականության վիճակը։ Դեռևս 1921 թ. մարտին անգլիական իշխանությունները հայտարարել էին, որ ապրիլից գաղթականությանն այլևս նյութական օգնություն ցույց չի տրվելու, այլ նրանք պետք է կապվեն հողի հետ, զբաղվեն հողագործությամբ և զրանով փող վաստակեն, որով իբր թե հնարավորություն կունենային վերադառնալու հայրենիք։ Հողին կապվելով գաղթականությունը պարտավոր էր 4—5 տարի ևս մնալ այնտեղ, բայց իրա-

<sup>45</sup> ՀՍՄԽ ՀԽԿԿԱ, ֆ. 4/114, գ. 89, ք. 38—39։

<sup>46</sup> Ն ու յ ն տ ե գ ու մ ։

կանում ոչ միայն 4—5, այլև տասը տարում էլ հնարավոր չէր այնքան գումար կուտակել, որ նրանք կարողանային սեփական միջոցներով հայրենիք վերադառնալ: Հայերը ճիշտ են կռահում անգլիական գաղութարարների իսկական նպատակները և կտրականապես հրաժարվում են ցրվել Միջագետքի անապատներում ու կապվել հողին:

Միջագետքում այն ժամանակվա անգլիական Բարձրագույն Կոմիսար Ռ. Ջ. Քոքսի՝ Գաղութների մինիստր Ուինստոն Չերչիլին ներկայացրած մի զեկուցագրից երևում է, որ 1921 թ. ամռանը որոշված է եղել Միջագետքում ցրել հայ գաղթականությանը՝ ամեն մի ընտանիքին տալով 65 ուրլի, իսկ ամեն մի անձին՝ 13 ուրլի 14 օրվա օրապահիկ: Սակայն այդ ծրագիրը, Քոքսի ասելով, չհաջողվեց ամբողջությամբ գործադրել, որովհետև գաղթականները մերժեցին, ինչ օրապահիկն ստանալ և թե ճամբարների վրանները քանդել: Իսկ երբ անգլիական իշխանությունները հրավիրում են արաբ ոստիկաններ և փորձում նրանց օգնությամբ վրանները քանդել, նահրէլօմարի քեմերի ժողովուրդը դուրս է գալիս ու քարկոծում նրանց:

Այնուհետև զգալով, որ հայ տարագիրները երբեք էլ չեն թողնելու ճամբարը, անգլիացիները որոշում են նրանց ժամանակավորապես օգտագործել Աբադանի նավթահանքերում, բայց այդ պահանջը ևս հայերի կողմից մերժվում է: Այն ժամանակ, անգլիացիները դիմում են մի այլ հրեշավոր միջոցի. վրանները վաճառում են տեղական արաբ վաշխառուներին և հայտարարում, որ այլևս 13 ուրլի 14 օրվա օրապահիկը նույնպես չի տրվելու: Կոմիսար Քոքսը, այս բոլորը նկարագրելով գաղութների մինիստրին, զգուշացնում է, որ անգամ հիվանդների պատճառով չի կարելի հապաղեցնել վրանների քանդումը<sup>47</sup>:

1921 թ. ամռանը Միջագետքի գաղթականության ներկայացուցիչները բանակցությունների մեջ են մտնում Թավրիզում գտնվող Սովետական Հայաստանի կառավարության Գաղթականական գործերի լիազոր Գր. Վարդանյանի, ինչպես նաև Երևան մեկնած իրենց պատվիրակների միջոցով ՀՍԽՀ Ժողկոմխորհի նախագահ Ալ. Մյասնիկյանի հետ և խնդրում շուտափույթ կերպով գաղթականությանը փոխադրել Հայաստան<sup>48</sup>: 1921 թ. սեպտեմբերի 4-ին Միջագետքի հայ գաղթականության ներկայացուցիչ Ազատ Սիմոնյանը Սովետական կառավարությանը ներկայացնելով նրանց ծանր վիճակը, Թեհրանից գրում էր. «Մեր 12 հազարանոց գաղթականությունը, որ 7—8 տարիների բազմատեսակ տառապանքներին և տանջանքներին դիմագրաված է, ներկայիս հետին մտքերով ձգտում են (անգլիացիները—Հ. Մ.) կապել իրենց համար անհարազատ և օտար հողին՝ խեղդելով նրանց մեջ հայրենիք վերադառնալու իդեալը»:

Ինաջնջումի նախօրյակին այս բազմաշարժար գաղթականությունը կսիրե հուսալ իր փրկությունը միայն իր հարազատ հայրենիքից: Այժմ լիահույս ենք, որ Խորհրդային Հայաստանի Կառավարությունը ոչ մի զոհողության և դժվարության առաջ կանգ չի առնի փրկելու համար գաղթականության այդ բեկորները, տեղափոխելով Բասրայից դեպի հարազատ հայրենիք, որտեղ միայն հնարավորություն պիտի ունենան լծվելու խաղաղ և շինարար աշխատանքի»<sup>49</sup>:

<sup>47</sup> Ն. ու յ ն տ ե գ ու լ մ, ֆ. 4/114, դ. 80, թ. 43—48:

<sup>48</sup> Ն. ու յ ն տ ե գ ու լ մ, ֆ. 114, դ. 207, թ. 122:

<sup>49</sup> Ն. ու յ ն տ ե գ ու լ մ, ֆ. 4/114, դ. 5, թ. 61:

Սովետական կառավարությունը, ստանալով այս տեղեկությունները գաղթականության վիճակի մասին, Արտաքին Գործերի Ժողկոմ Ասքանազ Մոսվյանի ստորագրությամբ, 1921 թ. հոկտեմբերի 7-ին նոտայով դիմում է Անգլիայի արտաքին գործերի մինիստր Քերզոնին և առաջարկում միջոցներ ձեռք առնել գաղթականությանը Հայաստան փոխադրելու համար:

Նոտայում ասված էր. «Ստույգ տեղեկություններ առնելով Բաղդատի հայերից՝ Միջագետքի անգլիական իշխանություններից կախում ունեցող 14 հազար տարագիր գաղթականության վատթար վիճակի մասին, որը հետևանք է գաղթականությանը տրվող պետական նպաստի դադարեցմանը և նրա բռնի տեղահանմանը սկսած օգոստոսի 1-ից, սորանով պատիվ ունեմ դիմելու Ձեզ Հայաստանի Սոցիալիստական Խորհուրդային Հանրապետության կառավարության անունից հետևյալով.

Ոգնության գործի դադարեցումը Միջագետքի անգլիական իշխանությունների կողմից փաստորեն համազոր է գաղթականությանը մահվան դատապարտելուն: Այն տարերային ու աղետաբեր գաղթը, որին ճարահատյալ դիմել են այսօր հայ գաղթականները Բասրայի անհամբույր շրջավայրերից, որտեղ նրանց ներփակել են անգլիական տեղական իշխանությունները, մղում նրանց սովի, համաճարակ հիվանդությունների և մահվան գիրկը: Եվ հազիվ թե այդ 14 հազար տառապող ժողովրդից ազատվեն մի քանի խղճով բեկորները»<sup>50</sup>:

Նկարագրելով հայ տարագիրների նկատմամբ անգլիական գաղութարարների վարած քաղաքականության հետևանքով առաջացած ողբերգական ծանր վիճակը, Սովետական Հայաստանի Արտաքին Գործերի Ժողովրդական Կոմիսարն առաջարկում էր Անգլիայի Արտաքին Գործերի Մինիստրին՝ համապատասխան կարգադրություն անել անգլիական իշխանություններին, որպեսզի դադարեցվեն գաղթականությանը Միջագետքում ցրելու և նրանց համար օտար ու անհարազատ հողին կապելու ուղղությամբ կատարվող ձեռնարկումները և շարունակվի նրանց օգնության գործը:

«Այդ գործը, — այնուհետև շարունակվում է նոտայում, — կարող է կատարել և պարտական է անել Բրիտանիայի ներկա կառավարությունը, որը մինչև այսօր կապված է եղել վերոհիշյալ հայ գաղթականական զանգվածի հետ: Իսկ եթե Բրիտանիայի կառավարությունը հրաժարվի ստանձնել իր վրա այդ դժբախտ գաղթականների հոգացողությունը, կխնդրեի զեթ կատարել նրանց վերջին իղձը և միջոցներ ձեռք առնել նրանց տեղափոխելու Պոլսի վրայով դեպի Բաթում, որպեսզի Հայաստանի կառավարությունը հնարավորություն ունենա տեղավորել նրանց իր սահմաններում»<sup>51</sup>:

Սովետական կառավարության ձեռք առած վճռական միջոցների շնորհիվ և հասարակական կարծիքի ճնշման տակ անգլիական իշխանությունները ստիպված համաձայնվեցին Միջագետքի գաղթականներին նավերով հասցնել Բաթում, 1921 թ. դեկտեմբերի 13-ին ՀՍԽՀ Ժողկոմխորհի նախագահությունը քննարկում է Միջագետքից Հայաստան ժամանող 3000 գաղթականներին ընդունելու հարցը և որոշում է հանձնարարել Հողագործության Ժողովրդական Կոմիսար Արամայիս Երզնկյանին՝ շտապ միջոցներ ձեռք առնելու նրանց Ալեքսանդրապոլի, Ղարաքիլիսայի (այժմ Կիրովական), Զալալ օղլու (այժմ Ստեփանավան) և այլ շրջաններում բնակեցնելու, հողով ապահովելու և նյութական

<sup>50</sup> Ն ո տ յ ն տ եղ ու մ, ֆ. 114, գ. 97, թ. 71:

<sup>51</sup> Ն ո տ յ ն տ եղ ու մ:

լայն աջակցություն ցույց տալու ուղղությամբ<sup>52</sup> 1921 թ. դեկտեմբերի 20-ին Վրաստանում ՀՍԽՀ դիվանագիտական ներկայացուցիչ Հ. Սուրխաթյանը Թիֆլիսից հեռագրում է Ժողովրդական հորին, որ արդեն Բաթում է հասել շոգենավը Միջազգետքի մոտ 3000 գաղթականներով<sup>53</sup> Այդ խմբի մեծ մասը տեղավորվում է Ալեքսանդրապոլի, Բասարաբեյարի և Ղամարուլի շրջաններում<sup>54</sup>։

Նկատի առնելով Հայաստանի այն ժամանակվա տնտեսական ծանր պայմանները, բնակարանների ու կենսամթերքների պակասը, պիտի ասել, որ Սովետական կառավարության այդ քայլը գաղութահայ աշխատավորության նկատմամբ ցուցաբերած վառ հոգատարության մի ակտ էր, որը կատարվում էր Միջազգետքի անապատներում անխուսափելի ոչնչացման դատապարտված ժողովրդի կյանքը փրկելու համար։

Հակառակ գոյություն ունեցող նախօրոք մշակված համաձայնությանը, որպեսզի Սովետական կառավարության նկատմամբ դժգոհություն առաջացնեն ներգաղթողների մեջ, անգլիական իշխանությունները որոշում են Միջազգետքի հայ գաղթականների փոխադրությունը մինչև Բաթում կատարել հենց ձմեռվա ամիսների ընթացքում, երբ էլ ավելի դժվար կլինեք հոգալ նրանց բազմատեսակ կարիքները։

1921 թ. դեկտեմբերի 27-ին ՀՍԽՀ Ժողովրդական կրկին քննարկում է միջազգետքահայերի ընդունելության հարցը և որոշում է ձմեռվա ամիսներին միանգամայն հնարավորություններից դուրս համարել դաղթականներին Հայաստան ընդունելը, հավանություն տալ Արտգործժողովում քայլերին՝ մինչև 1922 թ. գարունը ներգաղթի շկատարելու ուղղությամբ և խնդրել Սովետական Ռուսաստանի կառավարությանը՝ Թեհրանի իր դիվանագիտական ներկայացուցչության միջոցով գաղթականությանը ցույց տալ նյութական օգնություն, մինչև որ գարնանը փոխադրվի Հայաստան։ Նույն օրը Արտգործժողովում Ա. Մուսախանը նոտայով դիմում է Անգլիայի Արտաքին գործերի մինիստր Քերզոնին։ Այդ նոտայում նշվում էր, որ ՀՍԽՀ կառավարությանը հայտնի է դարձել, որ արդեն սպասվում է Միջազգետքի 7000 գաղթականների մուտքը Բաթում, մի բան, որը անհնարին է ընդունել ներկայումս։ Սովետական կառավարությունն ընդունելով միջազգետքահայ գաղթականության 3000 հոգուց բաղկացած առաջին խմբին, միաժամանակ Բրիտանական կառավարությանը նախազգուշացրեց այն մասին, որ նկատի ունենալով տրանսպորտի բացակայությունը և ձմեռային եղանակները, բնակարանների սղությունը՝ մեծ թվով գաղթականության համար, նպատակահարմար է դադարեցնել գաղթականության փոխադրությունը մինչև 1922 թ. ապրիլը և այնուհետև տեղափոխել ավելի փոքր խմբերով, հազար հոգուց ոչ ավելի ամեն խմբում, ամսական մեկ անգամ։ Արտգործժողովումատր հայտնելով այդ մասին, կրկին դիմում է Բրիտանական կառավարությանը դադարեցնելու գաղթականության տեղափոխությունը և շարունակելու ցույց տալ նյութական օգնություն՝ մինչև 1922 թ. ապրիլ ամիսը<sup>55</sup>։

<sup>52</sup> Ն ու յ ն տ ե ղ ու մ, ֆ. 40/113, ց. 3, գ. 25, թ. 56։

<sup>53</sup> Ն ու յ ն տ ե ղ ու մ, ֆ. 4/114, գ. 96, թ. 631։

<sup>54</sup> Ն ու յ ն տ ե ղ ու մ, թ. 641։

<sup>55</sup> Ն ու յ ն տ ե ղ ու մ, ֆ. 40/113, ց. 7, գ. 25, թ. 60։

<sup>56</sup> Ն ու յ ն տ ե ղ ու մ, ֆ. 4/114, գ. 51, թ. 113։

Սակայն հաշվի չառնելով այդ դժվարությունները, անգլիական իշխանությունները հապճեպորեն իրագործում են իրենց որոշումը, այն էլ այնպիսի շտապողականությամբ, որ ինչպես պատմում են ականատեսները, պատահում էր, որ ծնողները նաև էին նստում, իսկ երեխաները մնում էին, կամ ամուսիններից մեկը մնում էր, մյուսը՝ նաև նստում<sup>57</sup>։ 1922 թ. հունվարի 2-ին ՀՍԽՀ կոմգործժողկոմատը մի հուշագիր է ուղարկում Կ. Պոլսում Բրիտանական Կերպուլյն Կոմիսարին, որտեղ նշվում է, որ Սովետական Հայաստանի կառավարությունը մինչև 1922 թ. ապրիլը ի վիճակի չէ Միջազգետքի հայերին երկիր ընդունել բնակարանների և անհրաժեշտ այլ միջոցների պակասության պատճառով։ Չնայած դրան, քանի որ նրանք արդեն գտնվում են ճանապարհին, ոչստի կրնդունվեն, բայց այդտեղից բխող բոլոր բարդությունների ամբողջ պատասխանատվությունը պետք է ընկնի անգլիական կառավարության վրա<sup>58</sup>։

1922 թ. հունվարի 10-ին Բաթում է ժամանում Միջազգետքի գաղթականության մոտ 3000 մարդոց բաղկացած երկրորդ քարավանը, որին ընդունելու և տեղավորելու համար Սովետական կառավարությունը ձեռք է առնում արտակարգ միջոցներ։ Այդ խմբում ներգաղթածների զգալի մասը ժամանակավորապես տեղավորվում է Ղամարլուի շրջանում գտնվող զորանոցներում, որպեսփի գարնանը տեղափոխվի Վեգի<sup>59</sup>։

Չնայած բազմատեսակ կարիքներին, բոլոր ներգաղթածներն էլ գոհ և ուրախ էին, որ երկարատև դեգերումներից ու անլուր զրկանքներից հետո, բախտ ունեցան իրենց օջախները վերստեղծելու հայրենի հողի վրա։

Միջազգետքի և Պարսկաստանի հայ գաղթականությանը Արևելքի երկրներում շորվելու և հայրենիք վերադարձնելու գործում լուրջ օգնություն ցույց տվեց Սովետական Ռուսաստանի կառավարությունը Թեհրանի իր դիվանագիտական ներկայացուցչության միջոցով<sup>60</sup>։

Միջազգետքի հայ գաղթականները առաջիններից մեկն էին սփյուռքահայ բազմահազար այն աշխատավորներից, որոնք կարողացան վերադառնալ հայության նոր, շահագործումից ազատագրված սոցիալիստական հայրենիքը, ուր տիրում էր սոցիալական ու քաղաքական իսկական իրավահավասարություն և տարբեր ազգերի եղբայրական համերաշխություն։ Վեդիում տեղավորված միջազգետքահայ գաղթականներին 1922 թ. ամռանը այցելած մի ականատես գրում էր, թե «գուցե տարօրինակ երևույթ նկատվի այն համերաշխ կենցաղը, որ ներկայիս գոյություն ունի անհաշտելի նկատված այդ երկու տարրերի՝ տեղական թուրքերի (այսինքն աղբբեջանցիների—Հ. Մ.) և վերաբնակ հայ գաղթականների միջև, բայց և այնպես ներկա մոմենտում նա փաստ է, մի կարկառուն փաստ, որ գալիս է միանգամ ևս գնահատելի դարձնելու որ միայն խորհրդային իշխանությունը ընդունակ է հաշտեցնելու տարբեր լեզուների ու կրոնների աշխատավորներին»<sup>61</sup>։

Ներգաղթողներին ինչպես ճանապարհին, այնպես էլ երկրում տեղավորելուց հետո, Սովետական կառավարության և տեղական իշխանությունների ու աշխատավորների կողմից, ցույց էր տրվում լայն օգնություն։ Նրանք օգտը-

<sup>57</sup> «Նորհրդային Հայաստան», 25 սեպտեմբերի, 1924, № 219։

<sup>58</sup> ՀՍՍՌ ՀԻԿՊԱ, ֆ. 4/114, դ. 98, թ. 748։

<sup>59</sup> Ն ու յ ն տ ե դ ու մ, դ. 5, թ. 78։

<sup>60</sup> Ն ու յ ն տ ե դ ու մ, դ. 16, թ. 89։

<sup>61</sup> «Նորհրդային Հայաստան», 3 սեպտեմբերի, 1922, № 200։

վում էին առանց մաքսերի ու տուրքերի մեծ շափերի հասնող բեռների ձրի փոխադրության իրավունքից, ստանում էին ձրի բժշկական օգնություն և այլն<sup>62</sup>։ Այնտեղ, ուր նրանք մշտական բնակություն էին հաստատում, տրվում էր անհրաժեշտ քանակությամբ հող, լժկաններ, գյուղատնտեսական գործիքներ, սերմացու, բնակարաններ, վարկեր, շինանյութեր և այլ միջոցներ։

Միջազգետքում մնացած հայ գաղթականության մեծ մասը՝ Սովետական Հայաստան վերադարձավ հաջորդ տարիներին և նույնպես հնարավորություններ ստացավ կարճ ժամանակամիջոցում թոթափելու իր կրած տառապանքների փոշին ու կապվելու երկրի վերաշինության գործին<sup>63</sup>։

Այսպիսով, Վասպուրականի, Սալմաստի, Ուրմիայի, Խոյի և առաջին համաշխարհային պատերազմի տարիներին այլ վայրերից Միջազգետքում կուտակված հայ գաղթականության մեծ մասը՝ ավելի քան 3000 մարդ, բաթումով և Զուլֆայով Սովետական Հայաստան ներգաղթեց 1921 թ. վերջերին և 1922 թ. սկզբներին։ Նրանք տեղավորվեցին հիմնականում Վեդու, Բասարգեշարի, Ալեքսանդրապոլի և Ղամարուի շրջաններում<sup>64</sup>։

Սփյուռքահայ աշխատավորները, որոնք սկսեցին հայացքներով անընդհատ հետևում էին Սովետական Հայաստանի վերաշինությանը, տեսնելով նաև իրենց գաղութահայ եղբայրների քաղաքական լիիրավ վիճակն ու օրեցօր բարելավվող նյութական բարեկեցությունը երկրում, ձգտում էին նույնպես վերադառնալ հայրենիք։ Սովետական կառավարությունը նրանց այդ բաղձանքների իրականացմանը լայնորեն ձեռնամուխ եղավ հետագա տարիներին։

<sup>62</sup> ՀՍՍՌ ՀՌԿԱ, ֆ. 40/113, ց. 3, գ. 374, թ. 18։

<sup>63</sup> Ն ու յ ն տ ե գ ու մ, տե՛ս զգ. 297, 377 և այլն։

<sup>64</sup> Տե՛ս «Պորհրդային Հայաստան—1920—1925», ժողովածու, Երևան, 1926, էջ 69,